




LAPORAN...Laporan Banci Nelayan disampaikan oleh Dr. Felix (empat dari kanan) kepada Samsuddin (tiga dari kiri) sambil diperhatikan oleh Abdul Mijul (dua dari kiri), Dr Ismail (tiga dari kanan) dan Masood (dua dari kanan).



PENGHARGAAN...Masood (tiga dari kanan) menyampaikan penghargaan kepada Dr Ismail disaksikan oleh Dr Felix, Samsuddin dan Abdul Mijul.

# 95% keluarga nelayan keluar garis kemiskinan

NST 05-05-2012 3

OLEH MARRYAN RAZAN (marrayan@newsabahtimes.com.my)

**KOTA KINABALU:** Program peningkatan taraf hidup pelbagai agensi kerajaan persekutuan dan negeri berjaya mengeluarkan 95 peratus keluarga nelayan daripada garis kemiskinan.

Berdasarkan Banci Nelayan Sabah 2012 mendapati 95 peratus daripada isi rumah keluarga nelayan di negeri ini memiliki perolehan bulanan di atas paras kemiskinan hasil daripada program itu.

Pengurus Besar Korporasi Kemajuan Perikanan dan Nelayan Sabah (Ko-Nelayan), Haji Masood Haji Salleh berkata dapatan bancian tersebut menunjukkan program-program yang telah dilaksanakan oleh Ko-Nelayan dan agensi-agensi lain berjaya membantu menaik taraf hidup masyarakat nelayan di Sabah.

"Laporan banci itu juga menunjukkan bilangan nelayan artisanal (tra-

disional) berstatus warganegara Malaysia pada tahun 2011 adalah seramai 14,260 orang berbanding Perangkaan Tahunan Jabatan Perikanan Sabah (JPS) 2007 yang menganggarkan terdapat kira-kira 20,845 nelayan sepenuh masa di negeri ini," katanya.

Beliau menjelaskan, dapatan itu terkandung dalam Laporan Banci Nelayan Artisanal yang dijalankan oleh Ko-Nelayan dengan kerjasama Universiti Malaysia Sabah (UMS) yang diketuai oleh Prof. Madya Dr. Ismail Ali selama kira-kira tiga tahun bermula November 2008 hingga Mac 2012.

Masood berkata, banci yang komprehensif sangat diperlukan untuk dijadikan rujukan dan panduan pihak kerajaan dalam membuat perancangan mengenai program-program peningkatan taraf hidup golongan nelayan di negeri ini.

"Banci nelayan ini juga telah memberikan beberapa cadangan mengenai langkah meningkatkan kualiti hidup

nelayan dari segi pendidikan anak-anak, kesihatan, kebersihan, alam sekitar, perumahan dan perubahan minda nelayan," katanya.

Laporan Banci Nelayan tersebut telah diserahkan secara rasmi oleh Pengarah Pusat Pengurusan Penyelidikan & Inovasi, UMS, Prof. Dr. Felix Tongkul mewakili Naib Canselor UMS kepada Pengerusi Ko-Nelayan, Datuk Samsuddin Yahya di Wisma Pertanian di sini kelmarin.

Menyaksikan penyerahan rasmi itu ialah Timbalan Pengerusi Ko-Nelayan, Datuk Abd Mijul Unaini, ahli-ahli lembaga pengarah dan Timbalan Dekan Pusat Penataran Ilmu dan Bahasa (PPIB), UMS, Dr Anantharaman Govindasamy.

Atas kejayaan program bancian itu, Masood berharap pihaknya dapat melaksanakan bancian yang serupa dengan memberi fokus terhadap kajian penglibatan wanita dalam pembangunan industri hiliran perikanan.